

摘藻堂四庫全書薈要

史部

欽定四庫全書薈要卷九千六百十四

史部

文獻通考卷二百九十三上

鄱陽馬端臨貴興著

象緯考十六上

星晝見

漢安帝永初二年正月戊子太白晝見占為強臣

前志曰太

白晝見強國弱小國強女主昌

時鄧氏方盛五年六月辛丑太白晝

見經天

春秋漢含孳曰陽弱辰逆太白經天註云陽弱君柔不堪鉤命決曰天失仁太白經天

元初四年正月乙未太白晝見丙上

以下書日書見者皆太白晝見也

順帝永建二年二月癸未太白晝見三十九日閏月乙

酉見東南維四十一日 五年閏月庚子 六年十月

乙卯 永和二年五月戊申 三年二月辛巳戊子在

熒惑西南光芒相犯三月壬子六月丙午八月乙卯俱

太白晝見太白者將軍之官又為西州晝見陰盛與君

爭明熒惑與太白相犯為兵喪是時大將軍梁商父子

秉勢故太白常晝見也 漢安二年正月己亥太白晝

見七月甲申見韓揚占曰天下有喪一曰有白衣之會
明年八月順帝崩又明年冲帝崩

孝桓元嘉元年二月戊午太白晝見永興二年閏月
丁酉見時上幸後宮采女鄧猛後四年梁后崩梁冀誅
猛立為后恩寵甚盛永壽元年九月己酉晝有流星
長二尺其色黃白延熹九年七月太白晝見經天為
兵憂在大人後一年桓帝崩太傅陳蕃大將軍竇武等
謀誅宦官不克皆枉死

魏文帝黃初四年六月甲申太白晝見按劉向五紀論
曰太白少陰弱不得專行故以己未為界不得經天而
行經天則為晝見其占為兵喪為不臣為更王強國弱
小國強是時孫權受魏爵號而稱兵距守 五年十月
乙卯見占同上 六年十一月丙寅見南斗遂歷八十
餘日恒見占曰吳有兵明年孫權遣張彌等將兵萬人
錫公孫淵為燕王淵斬彌等虜其衆

明帝青龍三年五月丁亥見積三十餘日以晷度推之

非秦魏則楚時諸葛亮據渭南宣帝與相持孫權寇合肥入淮沔天子親東征蜀本秦地則為秦魏楚兵悉起矣 四年三月己巳太白與月俱加景晝見月犯太白占同上 景初元年十月壬申見在尾歷二百餘日恒晝見占曰尾為燕有兵時公孫淵自立為燕王置百官發兵距守宣帝討滅之

晉惠帝元康六年十月乙未太白晝見 永康元年見占曰為不臣是月賈后殺太子趙王倫廢殺后及張華

明年倫篡位 永寧元年自正月至於閏月五星互經
天縱橫無常傳曰日陽君道也星陰臣道也日出則星
亡臣不得專也晝而星見午上者為經天其占為不臣
為更王今五星悉經天天變所未有也石氏說曰辰星
晝見其國不亡則大亂是後台鼎方伯互執大權二帝
流亡遂至六夷更王迭據華夏亦載籍所未有也其四
月歲星晝見五月太白晝見占同前 二年四月癸酉
歲星晝見占曰為臣強時齊王問定京都因留輔政專

傲無君成都河間長沙王討之問兵敗夷滅

成帝咸康四年四月己巳太白晝見在柳占為兵為不
臣明年石虎大寇沔南内外戒嚴

穆帝永和十年七月庚午太白晝見晷度推之灾在秦
鄭時桓溫伐苻堅破其嶢柳軍十二月慕容恪攻齊

十二年六月庚子見在東井占如上 升平四年十二
月庚辰見

哀帝興寧元年十月太白晝見在亢占亢為朝廷有兵

喪為臣強時桓溫方擅兵明年庾后崩

簡文咸安二年太白晝見在七星

孝武寧康二年十二月甲申太白晝見在氐氐兗州分

野 太元元年八月癸酉見在氐 二年九月壬午見

在角 六年九月丙子見 七年十一月太白又晝見

在斗占曰吳有兵喪 八年四月甲子又晝見在參占

曰魏有兵喪是月桓冲征沔漢楊亮伐蜀並拔城略地

八月苻堅自將百萬入寇攻沒壽陽劉牢之謝玄等破

之堅衆大潰至九年六月太后褚氏崩八月謝玄出屯
彭城經略中州 九年七月庚戌見十一月丁巳又見
十年四月乙亥晝見於畢昴占曰魏國有兵喪是時
苻堅大衆奔潰趙魏兵連相攻堅為姚萇所殺 十一
年三月戊申見在東井占曰秦有兵臣強六月甲申又
見於輿鬼占曰秦有兵時魏姚萇苻登連兵相征不息
甲午歲星晝見在胃占曰魯有兵臣強十二年慕容垂
寇東阿翟遼寇河上姚萇假號安定苻登自立隴上呂

光竊據涼土 十二年六月癸卯見在柳十月庚午見
在斗 十三年正月庚戌又晝見 十四年四月己巳
太白晝見於柳六月辛卯又晝見於翼九月庚寅又晝
見於軫 十六年四月癸卯朔見 十七年七月丁丑
見十月丁酉又晝見 十八年六月又晝見 十九年
五月又晝見於柳六月辛酉又晝見於輿鬼九月又見
於軫 二十年七月丁亥見在太微占曰太白入太微
國有憂晝見亢為兵喪 二十一年二月壬申太白晝

見三月癸卯太白連晝在羽林占曰有強臣有兵喪中
軍兵起三月太白晝見於胃占曰中軍兵起

安帝隆安元年四月丁丑太白晝見在東井占曰秦有
兵喪六月姚興攻洛陽郝恢遣兵救之冬長死子泓代
立二年六月戊辰攝提移度失常歲星晝見在胃究
州分野是年郝恢遣兵伐慕容寶於滑臺敗而還閏月
太白晝見在羽林十一月犯東上相五年正月太白
晝見自去年十二月在斗晝見至是月元興元年三

月戊子太白犯五諸侯因晝見占曰諸侯有誅 義熙
元年七月庚辰見在翼軫占曰為臣強荊州有兵喪
三年正月丙子見在奎五月己丑見在參占曰益州有
兵喪臣強 六年六月甲午見七月太白犯少微而晝
見 七年六月見在翼 九年五月壬辰太白犯右執
法晝見

恭帝元熙元年七月己卯太白晝見自義熙元年至是
太白經天者九草代更王臣失君之象也

宋文帝元嘉五年十一月日食星晝見

梁武帝天監四年六月壬戌歲星晝見占曰歲色黃潤
立竿影見大熟是歲大穰米斛三十又曰星與日爭光
武且弱文且強自此後帝崇尚文儒躬自講說終於太
清不修武備普通四年十一月太白晝見六年五
月己酉太白晝見六月癸未太白經天太清三年太
白晝見占曰有大喪天下革政更王強國弱小國強其
年帝為侯景所幽崩

陳廢帝光大二年九月戊午太白晝見占曰太白晝見
國更政易王其年十二月帝廢為臨海王

周武帝天和元年十月乙卯太白晝見經天

隋文帝開皇元年三月甲申太白晝見占曰為臣強為
草政四月壬午歲星晝見占曰大臣強有逆謀王者不
安其後劉昉等謀反伏誅二十年十月太白晝見占
曰大臣強為草政易王右僕射楊素熒惑高祖廢太子
勇明年改元皆陽失位及草政易王之驗也

唐高祖武德元年五月庚午太白晝見占曰兵起臣強
二年九月庚寅見 九年五月見六月丁巳經天已
未又經天在秦分巳卯見七月辛亥晝見甲寅晝見八
月丁巳晝見太白上公經天者陰乘陽也

太宗貞觀二十二年七月太白晝見

高宗永徽元年五月己未太白晝見十二月乙未見

四年六月己丑見 龍朔元年六月辛巳太白晝見經

天 永隆元年五月丁酉太白晝見經天是為陰乘陽

陽君道也

中宗景龍三年六月癸巳太白晝見在東井京師分野
玄宗開元十四年十月甲寅太白晝見

肅宗至德二載七月己酉太白晝見經天至於十一月
戊午不見歷秦周楚鄭宋燕之分

代宗永泰元年九月辛卯太白晝見經天 大歷八年
八月己丑太白入太微晝見占曰兵入天廷 十一年
閏八月丁酉太白晝見經天

憲宗元和九年七月太白入南斗至十月出乃晝見

穆宗長慶元年三月庚戌太白犯五車因晝見至於七月以歷度推之在唐及趙魏之分占曰兵起二年九月太白晝見四年三月庚午太白犯東井北轅遂入井中晝見經天七日而出因犯輿鬼京師分也六月己丑太白犯軒轅右角因晝見至於九月占曰相凶

文宗大和六年四月己丑太白晝見九年夏見自軒轅至於翼軫開成二年六月己酉見

僖宗乾符二年四月庚辰太白晝見在昴 三年七月
常星晝見

昭宗光化三年十一月丁未太白犯月因晝見 天復
元年五月自丁酉至於己亥太白晝見經天在井度
後唐莊宗同光三年六月甲子太白晝見己巳見

明宗天成元年七月庚申太白晝見 長興二年五月
癸亥見閏五月己巳歲晝見八月戊子太白晝見十月
壬辰太白晝見 四年五月癸卯太白晝見

末帝清泰元年五月己未太白晝見

漢高祖天福十二年四月丙子太白晝見

隱帝乾祐二年四年壬午太白晝見

周太祖廣順二年太白經天

宋太宗太平興國八年三月丙寅有星晝出西南當未地青白尾迹二丈餘沒於東南有光明占曰未地有兵是年西戎入寇宥州擊敗之淳化元年七月辛卯太白在角西南一尺許司天言據纏次當行中道南乘左

角主有謀不成按書太白形最大星中無比去太陽四十五度內晝見則占臣今占候太白晝見蓋去日極遠自然之理也

真宗咸平三年六月太白晝見占曰為兵喪 四年丙寅太白晝見在南斗 五年三月丙午有星晝出心至南斗沒赤光大餘九月丁未有星晝出紫微垣如半升器貫北斗沒 六年六月庚午有星晝出東方色黃白有尾迹占曰兵偃民樂之象甲午太白晝見八月庚午

太白晝見 景德元年六月戊午有星晝出西南方赤
黃有尾迹速流丈餘没十一月太白晝見占曰秦有兵
二年四月甲辰太白晝見 三年七月乙巳太白晝
見庚辰又晝見十二月太白晝見 四年三月庚申有
星晝見出南方 大中祥符元年七月庚申太白晝見
八月己丑有星晝出中天如太白有尾迹急流東南近
日没 二年五月乙亥有星晝出東方如太白尾迹赤
黃流至日北没占曰蠻夷起兵其年黎州蠻擾 四年

六月丙午太白晝見八月乙巳太白晝見 六年五月

乙巳有星晝出南方赤光迸逸若五升器照地明壬午

太白晝見 七年七月癸卯太白晝見十一月癸未

有星晝出日西南大如盃尾迹二大餘濶三寸許青白色

西流而沒占曰為旱火明年榮王宮火 九年五月庚

午太白晝見 天禧三年六月辛卯太白晝見占曰女

主昌八月辛卯又晝見 四年七月丁巳太白晝見

五年八月丙午太白晝見

仁宗天聖元年十一月壬辰太白晝見占曰有兵兵罷
無兵兵起不利先舉 天聖二年六月丁卯晝漏上星
出中天赤黃色有尾迹西南緩行入濁占曰大使以兵
事出其方行緩事遲 三年六月壬戌太白晝見十二
月戊寅見 五年五月壬寅見 明道元年七月見三
十日 慶歷三年八月甲寅見 皇祐三年四月丙午
見 至和元年五月壬辰見九月己丑見十月辛卯見
三年四月己丑見占曰太白少陰晝見於丙其占為

兵為不臣 嘉祐二年六月己未見占如上九月戊戌
晝漏上中天有星出狼大如杯東南速行至濁没尾迹
青白占曰流星大者使大今晝而星流主大使出狼星
有盜賊侵掠之事 四年正月庚戌太白晝見占曰太
白少陰弱不得專行故以己未為界不得經天而行經
天則晝見其占為兵喪為不臣強國弱小國強以日宿
推之屬秦魯分宜於其地謹備兵寇以應天象七月辛
丑見占曰西戎秦地防邊事十月乙丑晝漏上星出天

將軍西南行至濁没色青白尾迹凝天良久散 五年

三月乙未歲星晝見占曰為臣強為兵寇今推考歲星
在女度屬青齊分宜於其地嚴設警備九月庚寅太白
晝見 六年六月乙丑太白星晝見壬申歲星晝見占

曰日者陽君道也星者陰臣道也日出則星亡臣不得
專也今晝而星見其占為不臣及兵賊事以分野占之
在衛分十一月癸丑晝星出東北維去地五大許大如
盃向東北緩行入濁尾迹青白占曰流星晝出大臣災

色青白為兵憂又主陰謀事以分野日辰推之在魯衛
分及北狄鴈門 七年五月戊午太白見占皆同四年
七月事六月丙子歲星見占曰臣有不忠者七月己酉
太白經天復見占曰兵喪民災臣不順命不救則四夷
大動蠻貊來侵十月乙未見占曰為不臣為兵喪 八
年七月癸亥歲星晝見占曰臣強屬趙翼分

英宗治平元年正月戊戌太白晝見占同嘉祐七年十
月六月辛酉見占曰秦分兵喪壬戌歲星見占曰臣強

二年六月己丑晝有星出中天大如盃西速行至濁

沒尾迹赤黃占曰流星晝見明大民災兵革動速行入
濁其下陰謀相奪七月庚申晝漏未上星出紫宮西行
曳尾長二丈沒尾迹青白占曰有使出西方言兵事丁
丑太白見占曰為兵喪為不臣十二月辛亥見占如上
神宗治平四年二月丁酉太白晝見主為兵為大臣大
國弱小國強閏三月癸未見主兵凶五月辛巳見七月
癸卯見八月丁未見皆主有兵兵罷無兵兵起或大臣

有咎 熙寧元年十一月癸酉見占太白少陰弱晝見
於午為兵喪為不臣 二年六月壬戌見主秦分兵喪
三年五月癸巳見九月壬子皆見主為兵為占同五
月丙午見 八年三月戊午見七月戊寅見皆主兵
九年十月乙酉見 十年五月甲戌見 元豐元年四
月癸亥見主秦分兵或喪 三年七月戊子見占同
四年七月巳丑見 六年八月巳卯見 七年十一月
乙卯見主為兵為不臣

哲宗元祐元年六月庚戌見主無兵兵起有兵兵罷十
月庚寅見主秦地彊三年二月辛丑見七月辛未見
主秦分兵動六年四月壬寅見閏八月乙丑見七
年十一月辛巳見八年四月己未見紹聖元年正
月壬午晝星出中天如太白西南急流入濁沒赤黃主
兵五月己酉太白晝見六月丁丑晝有飛星出東南如
太白西北急流至中天沒青白有尾迹明燭地主國有
喜九月庚申太白晝見二年十一月丙申見主兵起

三年五月壬子見 四年三月己未晝星出東南丙
位如太白西南急流至未位没赤黃有尾迹主秦分有
兵及大疫六月己酉太白晝見 元符二年五月甲辰
見主秦地有兵八月癸巳太白歲晝見主天下偃武罷
兵天子崇尚文學任用賢能

徽宗崇寧元年六月己酉見 三年正月癸卯見 大
觀二年十一月丁未見 四年十月戊戌見 政和三
年十二月辛酉見 四年十月乙丑見 五年三月辛

未見 八年十月己卯見 宣和二年六月丁丑見
六年十一月丙子見皆為大國弱小國強女后昌

高宗建炎元年十月甲戌太白晝見 紹興元年四月

壬申太白晝見占為兵喪是月隆祐太后崩諸路兵盜
未息 四年五月庚子太白晝見經天於是金人及偽

齊合兵入寇韓世忠敗之於大儀鎮十一月戊申太白
晝見經天於是始下詔聲劉豫罪致討金人入光州陷
滁州諸將退保逾月金始退師 六年正月壬辰太白

晝見經天於是諸將進攻劉豫豫以金人之師入寇諸將擊破之十七年五月辛丑太白晝見占為兵喪為不臣大臣行毒不出三年於是秦檜醜殺牛皐二十年八月六月壬辰太白晝見時金人再營汴將徙都舉兵南寇

孝宗隆興元年七月丙申太白經天晝見二年六月戊辰七月庚子俱太白晝見乾道元年三月甲寅乙亥太白俱晝見經天二年二月庚子流星晝見四月

甲申五月甲寅九月庚午太白俱晝見占不出三年有

大喪 三年九月戊子太白晝見 四年五月六月辛

卯太白俱晝見 五年六月庚寅太白晝見十一月甲

子五星晝見 淳熙三年五月癸酉太白經天晝見

四年十一月壬戌太白晝見 六年七月乙丑癸未太

白俱經天晝見 九年六月庚申甲子九月癸巳太白

俱晝見 十一年五月乙卯太白晝見 十二年六月

戊寅七月丁酉太白晝見至八月壬申乃伏 十四年

六月辛卯七月辛丑太白俱晝見

光宗紹熙元年五月丙子太白晝見 四年六月丙寅

十一月甲戌俱太白晝見

寧宗慶元元年三月庚寅七月己亥太白俱晝見 四

年九月壬寅癸卯太白俱晝見 嘉泰元年六月丙午

十一月己巳十二月己卯太白俱晝見占為兵喪為不

臣為秦強 三年六月癸亥太白經天晝見 開禧元

年三月庚申太白晝見 二年五月壬寅太白晝見

三年十二月乙巳太白晝見金人陷隨州 嘉定元年
五月甲子太白晝見時江西黑風峒為亂 四年七月
壬戌太白晝見於是攻金人甚急 五年九月丙午太
白晝見 六年二月丁丑太白晝見於是金國亂十二
月壬辰流星晝隕 七年五月丁丑八月乙巳太白晝
見是歲金人遷都於汴 九年五月癸酉太白晝見明
年金人入寇 十年六月乙丑癸酉十一月戊戌太白
俱晝見於是下詔北伐金人寇四川山東李全來歸

十三年二月庚子三月丁亥六月辛未辛卯太白俱晝
見經天於是金人犯淮蜀九月甲午太白晝見 十四
年三月甲午太白晝見 十五年五月庚戌九月辛未
太白俱晝見 十七年六月丁卯太白晝見

文獻通考卷二百九十三上

欽定四庫全書薈要卷九千六百十五

史部

文獻通考卷二百九十三下

鄱陽馬端臨貴與著

象緯考十六下

五星聚舍

周將伐殷五星聚房

齊桓公將伯五星聚箕

漢高帝元年十月五星聚於東井以歷推之從歲星也

李奇曰歲星得其正度其四星隨比常正行
故曰從也孟康曰歲星先至先至為主也 客謂張耳

曰東井秦地漢王入秦五星從歲星聚當以義取天下

魏崔浩集諸歷家考校漢元以來日月薄食五星行
度并譏前史之失別為魏歷以示高允允曰漢元年
十月五星聚東井此乃歷術之淺事今議漢史而不
覺此謬恐後人之譏今猶今之譏古也浩曰所謬云
何允曰按星傳太白辰星常附日而行十月日在尾
箕昏沒於申南而東井方出寅北二星何得背日而

行是史官欲神其事不復推之於理也浩曰天文欲為變者何所不可邪允曰此不可以空言爭也宜更審之坐者咸怪之唯東宮少傅游雅曰高君精於歷數當不虛也後歲餘浩謂允曰先論本不經心及更考究果如君言五星乃以前三月聚東井非十月也衆乃歎服

孝文後六年四月乙巳水木火三合於東井占曰内外有兵與喪改立王公東井秦分也是歲誅反者周殷長

安市其七年六月文帝崩其十一月戊戌土水合於危
占曰為雍沮所當之國不可舉事用兵必受其殃一曰
將覆軍危齊也

孝景元年正月癸酉金水合於婺女占曰為變謀為兵
憂婺女粵也又為齊其七月乙丑金木水三合於張占
曰内外有兵與喪改立王公張周地今之河南又為楚
其二年七月丙子火與水晨出東方因守斗占曰其
國絕祀至其十二月水火合於斗占曰為淬不可舉事

用兵必受其殃一曰為北軍用兵舉事大敗斗吳分也
又為粵是歲立六皇子為王王淮陽汝南河間臨江長
沙廣川其三年七國反漢遣大將軍周亞夫討平之吳
王亡走粵粵攻而殺之齊趙諸國兵皆敗 中元年正
月丁亥金木合於觜觿為白衣之會其五月甲午金木
俱在東井戊戌金去木留守之二十日占曰傷成於戊
木為諸侯誅將行於諸侯也 中三年十一月庚午夕
金火合於虛相去一寸占曰為鑠為喪虛齊也 四年

四月丙申金木合於東井占曰為白衣之會并秦也

其五年四月乙巳水火合於參占曰國不吉參梁也其
六年四月梁孝王死五月城陽王濟陰王死六月成陽
公主死出入三月天子四衣白臨邸第 後元年五月
壬午火金合於輿鬼之東北不至柳出輿鬼北可五寸
占曰為鏢有喪輿鬼秦也丙戌地大動鈴鈴然民大疫
死棺貴至秋止

後漢章帝建初五年二月戊辰木火俱在參五月戊寅

木水在東井黃帝星經曰木守東井有土功之事一曰大水郝萌曰歲星守參后當之熒惑守大人當之

和帝永元二年正月乙卯金木俱在奎丙寅水又在奎

巫咸曰辰守奎多水火災亦為旱古今注曰土在東井

奎主武庫兵三星會又為

兵喪辛未水金木在婁亦為兵又為匿謀

郝萌曰辰守婁有兵兵罷

無兵兵起巫咸石氏云多火災古今注丙寅水在奎土在東井金在婁木火在昴

五年四月

癸巳太白熒惑辰星俱在東井

黃帝經曰五星及客星守井皆為水石氏曰為

旱又曰太白入東井留一日以上乃占大臣當之期三月若一年遠五年

東井秦地為法三

星合内外有兵又為法令及水其六年七月水大漂沒

人民傷五穀九月遣兵征叛胡 七年二月癸酉金火

俱在參

巫咸占曰熒惑守參多火災海中占曰為旱戊太白守參國有反臣郝萌曰有攻戰伐國也

寅金火俱在東井

郝萌曰熒惑守井百川皆滿太白又從舍蓋二十日流國又曰雜糴貴又

將相 八月甲寅水土金俱在軫

春秋緯曰五星有入軫者皆為兵大起巫咸占

死 曰五星入軫者司其出入而數之期二十日皆為兵發

司始入處之率一日期十日軍罷石氏星經曰辰星守軫歲水郁萌曰鎮星出入留舍軫六十日不下必有大

喪春秋緯曰太白入軫兵大起郝萌曰太白守軫必有 十一月甲戌金火俱在心 心雄書曰太白守 十二月已

亡死 心後九年大饑

卯有流星起文昌入紫宮消丙辰火金水俱在斗流星
入紫宮金火在心皆為大喪三星合軫為白衣之會金
火俱在參東井皆為外兵有死將三星俱在斗有戮將
若有死相八年四月樂成王黨七月樂成王宗皆薨將
兵長史吳琴坐事徵下獄誅 元興元年閏七月辛亥
金水俱在氐

孝殤帝延平元年正月丁酉金火在婁金火合為爍為
大人憂是歲八月帝崩

孝靈光和五年十月歲星熒惑太白三合於虛相去各五六寸如連珠占曰火木金三合為喪至中平六年宮車晏駕虛齊地明年瑯琊王據薨

孝獻建安十八年秋歲星鎮星熒惑俱入太微逆行留守帝坐百餘日占曰歲星入太微人主改

魏明帝太和四年十一月壬戌太白犯歲星占曰有大兵五年三月諸葛亮以大衆寇天水宣帝為大將軍拒退之青龍二年二月己未太白犯熒惑占曰大兵起

有大戰是年四月諸葛亮據渭南吳亦起兵應之魏東
西奔命

晉惠帝元康三年鎮星歲星太白三星聚於畢昴占曰
為兵喪畢昴趙地也後賈后陷殺太子趙王廢后又殺
之斬張華裴頠遂篡位廢帝為太上皇天下從此遘亂
連禍 永寧二年十一月熒惑太白關於虛危占曰大
兵起破軍殺將虛危又齊分也十二月熒惑襲太白於
營室占曰天下兵起亡君之戒一曰易相初齊王問之

京都因留輔政遂專傲無君是月成都河間檄長沙王
又討之問又交戰攻焚宮闕問兵敗夷滅又殺其兄上
軍將軍實以下二千餘人泰安二年成都又攻長沙於
是公私饑困百姓力屈 泰安三年正月熒惑犯歲星
占曰有戰七月左衛將軍陳眘奉帝伐成都六軍敗績
光熙元年九月鎮星犯歲星占曰鎮與歲合為內亂
是時司馬越專權終以無禮破滅內亂之應也十二月
癸未太白犯鎮星占曰為內兵有大戰是後河間王為

東海王越所殺明年正月東海王越殺諸葛玫等五月
汲桑破馮嵩殺東燕王八月荀晞大破汲桑

懷帝永嘉六年七月熒惑歲星太白聚牛女之間徘徊
進退按占曰牛女揚州分是後兩都傾覆而元帝中興
揚土

元帝建武元年五月癸未太白熒惑合於東井占曰金
火合曰爍為喪是時愍帝蒙塵於平陽七月崩於寇庭
太興二年七月甲午歲星熒惑會於東井八月乙未

太白犯歲星合於翼占曰為兵饑 三年六月丙辰太

白與歲星合於房占同上永昌元年王敦攻京師六軍
敗績王敦尋死

成帝咸康三年十一月乙丑太白犯歲星於營室占曰
為兵饑四年二月石季龍破幽州遷萬餘家以南五年
季龍衆五萬寇沔南畧七千餘家而去又騎二萬圍陷
邾城殺畧五千餘人 四年十二月癸丑太白犯鎮星
在箕占曰王者亡地七年慕容皝自稱燕王 七年三

月太白熒惑合於太微中犯左執法明年顯宗崩 八年十二月己酉太白犯熒惑於胃占曰大兵起其後庾翼大發兵謀伐石季龍專制上流

康帝建元元年八月丁未太白犯歲星在軫占曰有大兵是年石季龍將劉寧寇沒狄道

穆帝永和四年五月熒惑入婁犯鎮星占曰兵大起有喪災在趙其年石季龍死來年冉閔殺石遵及諸胡十萬餘人其後褚裒北伐喪衆而薨 六年三月戊戌熒

惑犯歲星占曰為戰 七年三月戊子歲星熒惑合於

奎其年劉顯殺石祗及諸胡帥中土大亂 十二年七

月丁卯太白犯鎮星在柳占曰周地有大兵其年八月

桓溫伐苻健退因破姚襄於伊水定周地 升平二年

八月戊午熒惑犯鎮星在張占曰兵大起 三年八月

庚午太白犯鎮星在太微中占曰王者惡之 五年十

月丁卯熒惑犯歲星在營室占曰大臣有匿謀一曰衛

地有兵時桓溫擅權謀移晉室

海西公太和元年八月戊午太白犯歲在太微中 三年六月甲寅太白掩熒惑在太微端門中六年海西公廢

簡文咸安二年正月己酉歲星犯鎮星在須女占曰為內亂七月帝崩桓溫擅權謀殺侍中王坦之等內亂之應

孝武寧康二年十一月癸酉太白掩熒惑在營室占曰金火合為爍為兵喪太元元年七月苻堅伐涼州破之

虜張天錫 太元十年十二月己丑太白犯歲星占曰

為兵饑是時河朔未平兵連在外冬大饑 十七年九

月丁丑歲星熒惑鎮星同在亢氏十二月癸酉鎮星去

熒惑歲星猶合占曰三星合是謂驚立絕行内外有兵

喪與饑改立王公 十九年十月太白鎮星熒惑辰星

合於氐十二月癸丑太白犯歲星在斗占曰為亂饑為

內兵斗吳越分至隆安元年王恭等舉兵顯王國寶之

罪朝廷殺之是後連歲水旱饑

安帝隆安元年二月歲星熒惑皆入羽林占曰中軍兵

起四月王恭等舉兵內外戒嚴元興元年八月庚子

太白犯歲星在上將東南占曰楚兵饑一曰灾在上將

二年桓玄篡位劉裕盡誅桓氏二年十月丁丑太白

犯鎮星在婁占同上三年二月壬辰太白熒惑合於

羽林劉裕起義兵桓玄逼帝東下義熙二年十二月

丁未熒惑太白皆入羽林又合於壁三年正月慕容超

寇淮北徐州至下邳八月遣劉敬宣伐蜀三年二月

癸亥熒惑鎮星太白辰星聚於奎婁從鎮星也徐州分
是時慕容超僭號於齊兵連徐兗連歲寇抄至於淮泗
姚興譙縱僭號秦蜀盧循及魏南北交侵其五年劉裕
北殄慕容超其六月辛卯熒惑犯辰星在翼占曰天下
兵起八月己卯太白掩熒惑占曰有大兵其四年姚畧
遣衆征赫連勃勃大為所破 五年四月甲戌熒惑犯
辰星在東井占曰皆為兵十二月辛丑太白犯歲星在
奎占曰大兵起魯有兵是年四月劉裕討慕容超六年

二月滅慕容超於魯地 七年七月丁卯歲星犯鎮星

在參占曰歲鎮合為內亂一曰益州戰不勝亡地是時

朱齡石伐蜀後竟滅之明年誅謝混劉毅 八年十月

甲申太白犯鎮星在東井占曰秦有大兵 九年二月

庚午熒惑鎮星皆犯東井占曰秦有兵三月壬辰歲星

熒惑鎮星太白聚於東井從歲星也東井秦分十三年

劉裕定關中其後遂移晉祚裕十四年十月癸巳熒惑

入太微犯西蕃上將仍順行至左掖門內留二十日乃

逆行至恭帝元熙元年三月五日出西蕃上將西三尺
許又順還入太微時鎮星在太微熒惑繞鎮星成鉤已
其年四月庚戌從端門出占曰熒惑與鎮星鉤已天庭
天下更紀十二月安帝母弟瑯琊王踐阼是曰恭帝來
年禪於宋

宋文帝元嘉二十三年二月金火水合於東井

梁武帝普通七年正月癸卯太白歲星在牛相犯占曰
其國君凶易政明年三月改元大赦

陳武帝永定三年六月庚子鎮星在鉞與太白并占太白與鎮合為疾為內兵

文帝天嘉五年四月庚子太白歲星合在奎金在南木在北相去二尺許壬寅太白歲星合在婁相去一尺許六年正月己亥太白犯熒惑相去二寸占曰其野有兵喪改立侯王九月乙巳大白又犯熒惑明年帝崩少帝廢

廢帝光大元年八月壬午鎮星辰星合於軫九月戊午

辰星太白相犯占曰改立侯王 二年九月庚戌太白逆行與鎮星合在角占曰為白衣之會又曰所合之國為亡地為疾兵十二月廢帝為臨海王太建二年薨

宣帝太建十一年四月己丑歲星太白辰星合於東井十三年十二月癸酉辰星在太白上甲戌辰星太白交相掩占曰大兵在野大戰

魏道武天賜四年二月癸亥金水土聚

節閔帝普泰元年十月歲星熒惑鎮星太白聚於觜參

色甚明大占曰當有王者興其月齊高祖起於信都至
中興二年破爾朱兆開霸業

齊文宣天保十年六月庚子鎮星犯井鉞與太白并占
曰子為元柺齊之分野君有戮死者大臣誅鑕斧用其
明年常山王誅楊愔等廢少帝

武成河清四年正月己亥太白犯熒惑相去二寸在奎
甲辰太白熒惑歲星合在婁占曰甲為齊三星若合是
謂驚立絕行其分有兵喪改立侯王

後主武平二年八月癸未鎮星歲星太白合於氐宋之分野占曰其國有內外喪改立侯王四年十月陳將吳明徹寇彭城右僕射崔季舒等諫帝不宜北幸并州帝怒並誅之内外兵喪之應

周武帝保定二年十一月壬午熒惑犯歲星於危南

五年太白熒惑歲星合於婁 天和二年五月己丑歲

星與熒惑合在井宿相去五尺井為秦分占曰其國有兵為饑旱大臣匿謀下有反者若亡地閏六月丁酉歲

星太白合在柳相去一尺七寸柳為周分占曰為內兵
又曰主人凶憂失城是歲陳相州刺史華皎率眾來附
遣兵援之因而南伐衛公直與陳將戰於沌口王師失
利元定韋世沖以步騎五千先度遂沒陳 天和六年
六月庚辰熒惑太白合在張宿相去一尺占曰主人兵
不勝所合國有殃 建德元年三月丙辰熒惑太白合
於壁占曰其分有兵喪不可舉事用兵必受殃改立侯
王其月誅晉公護等及其黨詔以齊公憲為大冢宰七

月丙午辰與太白合於井相去七寸占曰其下之國必
以重德致天下後半年平齊致天下之應 二年十一
月壬子太白掩鎮星在尾占曰鎮星為女主尾為後宮
明年皇太后崩 三年十一月丙子歲星與太白相犯
光芒相及在危占曰其野兵人主凶失其城邑 宣政
元年六月壬午癸丑木火金三星合在井占曰其國霸
又曰内外有兵喪改立王侯七月丙辰熒惑太白合於
七星相去二尺八寸占曰君憂又曰其國有兵改立王

侯有德興無德亡後一年改置四輔官傳位太子改立王侯之應也

宣帝大象元年四月戊子太白歲星辰星合在井占曰是謂驚立是謂絕行其内外有兵喪改立侯王其五月趙陳越代滕五王並入國後二年隋受命宇文氏宗族相繼誅滅十月乙酉熒惑在虛與鎮星合占曰兵大起將軍為亂大人惡之是月相州段德舉謀反伏誅明年杞公宇文亮舉兵反擒殺之二年七月壬子歲星太

白合於張九月甲申熒惑歲星合於翼

唐高祖武德元年七月丙午鎮星太白辰星聚於東井
關中分也 二年三月丙申鎮星太白辰星復聚於東
井 九年六月己卯歲星辰星合於東井占曰為變謀
太宗貞觀十八年五月太白辰星合於東井占曰為兵
謀 十九年六月丙辰太宗征高麗次安市城太白辰
星合於東井史記曰太白為主辰星為客為蠻夷出相
從而兵在野為戰

高宗永徽元年七月辛酉歲星太白合於柳在秦分占
曰兵起

中宗景龍元年十月丙寅太白熒惑合於虛危占曰有
喪

睿宗景雲二年七月鎮星太白合於張占曰內兵太
極元年四月熒惑太白合於東井

玄宗天寶九載八月五星聚於尾箕熒惑先至而又先
去尾箕燕分也占曰有德則慶無德則殃 十四載二

月熒惑太白鬪於畢昴井鬼間至四月乃伏 十五載
五月熒惑鎮星同在虛危中天芒角大動搖占者以為
北方之宿子午相衝災在南方

肅宗至德二載四月壬寅歲星熒惑太白辰星聚於鶉
首從歲星也罰星先去而歲星留占曰歲星熒惑為陽
太白辰星為陰陰主外邦陽主中邦陽與陰合中外相
連以兵八月太白芒怒掩歲於鶉火又晝見經天鶉火
周分也 乾元元年四月熒惑鎮星太白聚於營室太

史南宮沛奏其地戰不勝衛分也

代宗大歷三年七月壬申五星並出東方占曰中國利
八年閏十一月壬寅太白辰星合於危齊分也 十

年正月甲寅歲星熒惑合於南斗占曰饑旱吳越分也
一曰不可用兵七月庚辰太白辰星合於柳京師分也
德宗建中二年六月熒惑太白關於東井 四年六月
熒惑太白復關於東井京師分也金火罰星關者戰象
也 興元元年春熒惑守歲星在角亢占曰有反臣角

亢鄭地 貞元四年五月乙亥歲星熒惑鎮星聚於營
室占曰其國亡地在衛分 六年閏三月庚申太白辰
星合於東井占曰為兵憂戊寅熒惑犯鎮星在奎魯分
也

憲宗元和九年十月辛未熒惑犯鎮星又與太白合於
女在齊分 十年六月辛未歲星熒惑太白辰星合於
東井占曰中外相連以兵 十一年五月丁卯歲星辰
星合於東井六月己未復合於東井占曰為變謀而更

事十一月戊子鎮星熒惑合於虛危十二月鎮星太白
辰星聚於危皆齊分也 十四年八月丁丑歲星太白
辰星聚於軫占曰兵喪在楚分與南方夷貊之國 十
五年三月鎮星太白合於奎占曰內兵徐州分也十二
月熒惑鎮星合於奎占曰主憂

穆宗長慶二年二月甲戌歲星熒惑合於南斗占曰饑
旱八月丙寅熒惑犯鎮星在昴畢因留相守占曰主憂
四年八月庚辰熒惑犯鎮星於東井鎮星既失行犯

鉞而熒惑復往犯之占曰內亂

敬宗寶歷二年八月丁未熒惑鎮星復合於東井與鬼
間

文宗大和二年九月歲星熒惑鎮星聚於七星 三年

四月壬申歲星犯鎮星占曰饑 四年五月丙午歲星

太白合於東井 六年正月太白熒惑合於羽林十月

太白熒惑鎮星聚於軫 八年七月庚寅太白熒惑合

相犯推歷度在翼近太微占曰兵起 開成三年六月

丁亥太白犯熒惑於張占曰喪 四年正月丁巳熒惑

太白辰星聚於南斗推歷度在燕分占曰內外兵喪改
立王公冬歲星熒惑俱逆行失色合於東井京師分也
武宗會昌二年六月乙丑熒惑犯歲星於翼占曰旱

四年十月癸未太白熒惑合於南斗 咸通中熒惑鎮
星太白辰星聚於畢昴在趙魏之分詔鎮州王景宗被
袞冕軍府稱臣以厭之

僖宗文德元年八月歲星鎮星太白聚於張周分也占

曰内外有兵為河内河東地

昭宗光化三年十月太白鎮星合於南斗占曰吳越有兵

後唐莊宗同光二年八月甲申歲星熒惑合在翼十四度 三年九月丙辰太白歲星相犯

明宗天成二年正月甲戌熒惑歲星相犯 三年春正月壬申金火合於奎九月庚辰鎮星歲星合於箕辛巳太白熒惑合於軫十二月壬寅金木相犯於斗

晉出帝開運元年十二月癸丑太白犯辰

漢高祖天福十二年六月鎮星太白歲星熒惑聚於張
占者云有帝王興於周者高祖起義自平陽趨洛以應
之及隱帝將嗣位又封周王暨周太祖登位以姬姓之
後復繼宗周天人之符乃有所屬

隱帝乾祐二年九月庚戌太白犯鎮丁卯太白犯歲鎮
自元年八月己丑入太微垣犯上將執法內屏謁者鉤
己往來至是歲十一月辛亥而出

凡四百四十三日

十一月辛

酉太白犯木

周太祖廣順元年十一月辰星歲星合宿於尾幽燕之分占其地合有變兼主饑饉疾疫

宋太祖建隆三年十一月壬申歲星熒惑合於房 乾

德四年六月己亥太白熒惑合於張 五年三月五星

如連珠聚於奎當魯分從鎮星晨見東方占曰有德受

慶大人奄有四方子孫蕃昌從鎮星王者以重致天下

重福明年真宗降誕 六年正月壬寅歲星鎮星太白

合於婁 開寶三年五月庚戌太白鎮星合於畢相去
二寸許六月乙未太白歲星合於東井相去四寸許
五年十月甲辰太白熒惑合於牽牛

太宗雍熙二年七月丙戌熒惑歲星合於軫 三年五

月丙戌熒惑太白合於畢 四年十二月丁巳太白鎮

星歲星合於南斗魁 端拱二年九月乙巳鎮星熒惑

合於南斗相去尺餘十一月壬辰歲星熒惑合於危

淳化二年正月癸丑鎮星太白合於須女三月癸丑太

白歲星合於婁太白在歲星南 三年正月丙辰太白

熒惑合於婁歲星在胃日官鄭昭晏言測金火行度合
相犯今火行而南金稍北有若相避 五年六月丙午

歲星太白合於柳相去三寸許 至道元年五月庚戌
歲星太白太陰同度不相犯乙卯鎮星熒惑合於東壁
相去七寸許丙辰太白歲星合於七星不相犯

真宗景德三年七月己酉辰星歲星太白合於柳 四
年七月五星當聚鶉火既而近太陽同時伏占曰猶臣

避君之明九月戊子歲星合於翼 大中祥符元年九月乙酉太白歲星合於角亢占在兗州之野其年東封泰山十月庚寅五星順行同色 六年正月癸巳五星順行五色占曰天下兵偃 天禧二年八月癸丑歲星熒惑合於張占曰東宮大慶其年仁宗升儲

仁宗天聖元年三月丁丑火犯木占曰天下受福 二年九月戊申金犯火 三年五月癸巳金水相犯於井 五年六月辛卯火犯土壬辰掩土 七年五月辛未

金犯土在畢宿一度半 八年六月乙酉金犯火 景

祐元年閏六月庚辰金犯土 二年五月丁亥又犯土

九月辛巳火犯土相去二寸許在張六度 三年五月

丁亥日官言太歲及歲星在北方宜飭備邊 四年九

月辛亥火犯土在翼十五度 康定元年九月壬申水

犯土 慶歷三年九月甲申金犯木 皇祐三年十一

月丁丑火犯土 至和三年九月乙巳金犯木 嘉祐

三年閏十二月甲戌火犯木躔斗四度占曰有子孫喜

燕分有兵 五年正月壬辰金犯木占曰為戰陣大將
有憂宜飭兵備 六年三月癸巳火又犯木在營室占
曰衛地有兵又為赦令七月己丑金犯土躔井十二度
占曰秦分兵饑 七年正月庚申又犯木占曰為饑為
兵營室衛分六月丁丑又犯火在翼一度半占曰內有
盜臣又為兵事翼楚分也 八年四月己丑又犯木在
胃占曰趙分兵饑是日熒惑晨見東方先是自七年八
月庚辰夕伏積二百四十九日祈禳於集英殿其日始

見五月庚申火犯木在昴四度占曰子孫之福又宜察
趙分兵謀之事 慶歷三年十一月壬辰五星皆在東
方占曰中國安寧

英宗治平元年十一月庚午水犯金在尾十六度占曰
辰星與太白合為陰謀為兵憂在燕趙分 二年四月
丁巳金犯木占曰為兵饑亦主后妃有憂戊子金犯土
在張五度占曰太子不安周分有兵八月己亥火犯木
躔柳七度半占曰秦分有兵謀亦為赦令十月丙申又

犯土在翼二度占曰南楚之分兵起 三年十二月癸卯金犯火躔危四度占曰有兵謀事

神宗治平四年九月癸巳太白犯鎮主兵或饑十月甲子熒惑犯鎮主兵大起十一月乙卯又犯歲主赦及天下受福 熙寧元年十一月己丑太白犯熒惑主兵客敗主勝或防逆謀 三年正月己未熒惑犯歲主赦或

子孫喜十月乙酉太白犯鎮主有兵 八年三月庚寅又犯鎮主燕分兵 十年七月癸酉又犯歲主秦分饑

元豐二年五月庚寅熒惑犯歲主兵 四年十月乙亥又犯太白金 五年三月丙戌太白犯鎮主兵戰女主灾十二月丙寅辰犯歲主兵 七年十一月甲寅太白犯歲主大將凶

哲宗元祐元年閏二月戊申八年四月乙卯太白犯熒惑皆主兵起 紹聖元年閏四月庚午熒惑犯鎮主兵起及後宮宜崇福 三年九月丙午太白犯鎮主楚分有兵 元符元年十二月乙未太白犯熒惑主大兵西

國敗 二年十月乙巳太白犯鎮主鄭分饑及後宮憂
十二月辛亥熒惑犯鎮主兵起及後宮

徽宗崇寧三年四月丙辰熒惑犯鎮主兵起大戰又曰
女子當之十一月庚寅太白犯辰主國不安先起兵者
凶 大觀元年十二月乙酉太白犯熒惑主君病太子
憂 二年正月甲寅太白犯歲主大戰民饑王者有賊
十月丁酉太白犯鎮主太子不安十一月壬申太白犯
歲主大戰民饑王者有賊 三年三月辛未太白犯歲

四年二月辛巳太白犯歲占同五月甲辰熒惑犯歲

主兵大起冊太子有赦 政和元年二月辛丑太白犯

鎮主兵饑太子不安十二月乙未太白犯鎮占同 三

年七月乙丑熒惑犯太白山主君亡天下兵起 四年十

月甲子熒惑犯歲主兵起冊太子有赦 七年正月癸

卯熒惑犯歲占同 宣和二年十月己卯太白犯熒惑

主君亡天下兵起 三年閏五月壬午熒惑犯歲主兵

起冊太子有赦 七年七月乙未太白犯歲主王者有

賊大戰民饑

欽宗靖康元年六月辛丑太白犯歲占同六月丙辰土火金木聚主大盪其下兵喪並起君子憂小人流

高宗建炎四年六月戊子熒惑與鎮合於亢占主兵喪旱是歲金再犯淮立偽齊江湖羣盜大起鄭后討至次年隆祐太后崩十一月辛丑太白歲星合於南斗占為戰大將死又西方凶於是張浚以五路之師敗於富平誅趙哲自秦州退軍興州次年陝西皆陷紹興元年

十一月乙卯太白與鎮星合 四年三月乙亥辰星與

太白合於畢占為兵憂又曰西方有兵不戰是秋岳飛
敗金於襄鄧張憲破之於唐州襄漢悉平 五年正月

乙卯太白鎮合於南斗閏二月丙午熒惑歲星合於昴

占為內亂臣有謀為旱為饑北軍困是歲亢旱 七年

四月丁巳金火合於東井占為爍為喪其下之國不可

舉事用兵又曰大人憂主兵不勝有破軍殺將又曰有

兵兵罷國安於是王倫歸金許和又許還河南諸州五

月乙亥水金火三星合於井占是謂驚立絕行有兵喪
民饑是年劉豫為金人所廢甲申火木金合於柳戊子
水火金木合於柳占謂大盪有兵喪君子憂小人流閏
十月丁卯火水合於氐占為北軍用兵舉事大敗 九
年三月癸卯金火合於井度占為爍為喪其下之國不
可舉兵又曰有破死將於是金人入東京河南陝西相
繼陷九月丁未水木合於角庚申金木合於角占大將
死十月壬申金木合於氐占同次年岳飛死於獄 十

年十一月丁未金土合於危占為疾為內兵十二月戊

子土金合於室十一年三月庚子朔土金復合於室

十七年五月乙丑木與金合占大將死白衣會十

九年六月壬戌金星行犯土星占太子不安憂於是秦

檜動搖皇子七月丁未金木水合於張占其分國內外

有兵災民饑改立王侯是歲完顏亮弑其主亶而自立

二十八年十月乙未水星順行犯土星占夏寒雨雪

妨女后閏六月己巳火星犯木星占冊太子當有赦明

年始正皇子名

孝宗隆興元年七月壬寅熒惑辰星合於柳占周分赤地千里又為饑有覆軍殺將在秋為兵或大旱是年有宿離之敗 乾道四年二月壬子水金合於胃占為變謀為兵憂同夜昏度瞻見金土晨度瞻見木火水是為水金火土木星俱見占五星並見其年必惡八月己亥水金火土木五星又俱見 六年五月乙亥五星俱見七月乙巳火星犯木在畢占冊太子當有赦次年立恭

王惇為皇太子十月庚申五星俱見 八年十月癸卯

五星見 九年三月辛丑火木合於柳四月乙丑火木

合於星占皆云為內亂臣有謀又云當其野旱以饑亡

是歲浙東江東西湖北諸州旱 淳熙十三年閏七月

戊午夜五星皆夕伏至戊辰五星伏聚在軫又至八月

乙亥日月五星俱聚軫占謂易行有德受慶亡德受殃


光宗紹熙四年三月辛巳水星與金星會於昴宿內占

為兵起為變謀

寧宗慶元元年四月辛酉木金合於井占為白衣會將
相死六月庚午金木合於井占西方凶又歲星所在太
白從之伐者利 三年八月甲戌金火木三星合於翼
占三星合是謂驚立絕行其分國內外有兵喪兵饑改
立王侯後二年光宗上僊 四年八月甲戌火與土合
於虛占為兵亂旱喪 五年八月辛丑火星犯木星占
冊太子當有赦 六年四月癸巳火土合於室及火犯
土星占為憂主孽卿會大人惡之又曰女子當之於是

慈懿皇后李氏光宗皇帝相繼崩 嘉泰二年正月丁巳金火水合於南斗占三星合為驚立絕行於是金國金起邊釁始開五月庚戌火星順行犯土星占大戰開禧二年二月壬申金木土三星合於昴宿占其分國内外有兵喪民饑改立王侯

文獻通考卷二百九十三下



總校官庶吉士臣張能照

校對官修撰臣張書勲

膳銀監生臣徐士俊

膳銀監生臣彭希純

欽定四庫全書薈要

史部
文獻通考卷二百九十四

詳校官員外郎臣潘紹觀



欽定四庫全書舊要卷九千六百十六

史部

文獻通考卷二百九十四

鄒陽馬端臨貴與著



緯考十七
瑞星

漢武帝元封元年望氣王朔言候獨見填星出如爪食
頃復入有司皆曰陛下建漢家封禪天其報德星云

德星

即填星也言天
以德星報帝

晉孝武太元二年七月己卯老人星見 三年七月乙

酉老人星見南方 十月丁巳老人星見

梁武帝天監四年八月庚子老人星見占曰老人星見
主壽昌自是每年恒以秋分後見於參南至秋分而伏
武帝壽考之象云

宋太祖皇帝開寶四年八月辛卯景星見

真宗景德三年四月戊寅周伯星出氐南騎官西一度
狀半月有芒角煌煌然可以鑒物歷庫樓東八月隨天

輪入濁十一月復見在氐自是常以十一月晨見東南
方八月西南入濁占曰天下無兵國大昌又氐為露寢
即天子正寢也 大中祥符七年正月己酉含譽星見
其年九月丙戌又見似彗有尾而不長與周伯星同占
太祖朝壽星見 乾德三年八月辛酉 四年八月乙
卯 六年正月戊申 開寶二年七月乙亥
太宗朝壽星見 太平興國四年八月乙亥 五年八
月己卯 六年八月己卯 八年八月辛卯 雍熙三

年八月己酉 四年八月辛亥 端拱元年八月乙卯

二年八月癸亥 淳化元年八月丁卯 二年八月

辛未 三年八月戊寅 四年九月己亥 五年八月

己丑 至道元年八月己亥 二年閏七月己亥 三

年八月辛丑

真宗朝壽星見 咸平元年八月癸丑 二年八月癸

亥 三年八月丁卯 四年八月甲子 五年八月乙

丑 六年八月丙子 景德元年八月癸酉 二年八

月庚辰 三年八月庚寅 四年二月己卯八月甲午

大中祥符元年正月丁亥八月丙申 二年二月壬

辰八月乙巳 三年二月辛巳八月己酉 四年正月

戊寅八月癸丑 五年正月辛巳八月己未 六年五

月庚子八月丙寅 七年正月癸丑八月己巳 八年

七月癸酉 九年正月甲寅八月壬午 天禧元年八

月癸巳 二年正月丁巳八月辛卯 五年二月辛卯

八月己亥 四年八月己亥 五年二月丙午八月乙

已皆出於丙

仁宗朝壽星見 天聖元年二月己亥 二年八月丙

子 四年七月壬申 景祐二年正月己丑 至和三

年二月辛卯八月己未 嘉祐二年八月庚申 三年

八月丙辰 四年正月庚戌八月癸未 五年八月庚

午 六年正月癸丑八月壬辰 七年正月辛亥 八

年正月辛酉

英宗朝壽星見 治平元年二月己丑七月癸巳 二

年二月癸巳八月巳亥 三年正月庚辰八月庚戌

神宗朝老人星見 治平四年二月癸巳八月戌申

熙寧元年正月乙未八月巳卯 二年二月乙卯八月

壬戌 三年正月甲寅八月癸酉 四年二月巳未八

月丁丑 五年二月巳未閏七月乙亥 六年正月庚

午八月丁酉 七年二月甲申八月庚寅 八年二月

巳丑八月庚戌 九年二月丁酉八月庚子 十年正

月巳卯九月戌申 元豐元年二月巳酉八月丙午

二年二月壬戌八月乙卯 三年二月甲寅八月己未
四年八月丁卯 五年二月甲戌八月己巳 六年
二月己未八月丁丑 七年二月辛巳八月己卯 八
年二月庚辰八月辛巳

哲宗朝老人星見 元祐元年二月戊寅八月庚子

二年二月庚寅九月辛亥 三年二月癸巳八月己亥

四年二月壬子八月丁未 五年正月甲午八月辛

亥 六年二月己亥閏八月壬戌 七年正月壬子八

月壬戌 八年二月丙寅八月己巳 九年二月乙丑

紹聖元年八月庚子 二年二月壬午八月丁丑

三年二月庚午八月癸未 四年二月甲申八月甲申

五年二月庚辰 元符元年八月辛卯 二年二月

乙未九月壬辰

徽宗朝老人星見 崇寧元年二月壬寅八月癸丑

二年二月甲寅八月庚戌 三年二月戊午八月辛酉

四年二月庚申八月丙寅 五年二月戊辰八月甲

戌 大觀元年二月乙亥八月丁丑 二年二月甲午

八月壬午 三年二月戊子八月癸巳 四年二月乙

未閏八月丁酉 政和元年二月癸卯八月己亥 二

年二月乙巳八月己酉 三年二月甲午八月己未

四年二月己酉八月辛未 五年二月庚申八月甲子

六年閏正月壬戌八月丁卯 七年五月戊午八月

丙子 八年二月壬申八月乙亥 宣和元年二月癸

未八月癸未 二年二月辛巳八月己丑 三年二月

丙戌八月癸巳 四年二月己亥八月辛丑 五年二月庚子八月丙午 六年二月戊申八月辛亥 七年二月癸丑八月庚申皆見於丙主人君壽昌天下安寧賢士進用

自太平興國以來星見必賀至熙寧四年詔罷賀禮
客星

漢武帝元光元年六月客星見於房占曰為兵起其二年十一月單于將十萬騎入武州漢遣兵三十餘萬以

待之

昭帝元鳳四年九月客星在紫宮中斗樞極間占曰為兵其五年六月發三輔郡國少年詣北軍

宣帝地節元年六月戊戌甲夜客星居左右角間東南指長可二尺色白占曰有姦人在宮庭間其丙寅又有客星見貫索東北南行至七月癸酉夜入天市芒炎東南指其色白占曰有戮卿一曰有戮王期皆一年遠二年是時楚王延壽謀逆自殺四年霍氏謀反誅黃龍

元年三月客星居王良東北可九尺長丈餘西指出閣道間至紫宮其十二月宮車晏駕

元帝初元元年四月客星大如瓜色青白在南斗第二星東可四尺占曰為水饑其五月渤海水大溢六月關東大饑民多餓死瑯琊郡人相食 二年五月客星見

昴分居卷舌東可五尺青白色炎長三寸占曰天下有

妄言者其十二月鉅鹿都尉謝君男詐為神人論死父

免官

孟康曰姓謝名君男者兒也不記其名直言男耳

後漢光武建武三十一年十月有客星焰二尺許西南行至明年二月二十二日在輿鬼東北六尺所滅凡見百一十三日輿鬼尸星主死亡客星居之為死喪後二年光武崩

按漢書嚴光傳帝即位思光召之至京入宮論道舊故因共偃臥光以足加帝腹明日太史奏客星犯御座甚急帝笑曰朕故人嚴子陵共臥耳通鑑載徵光事在建武五年然史志五年不言客星之

事云

孝明永平四年八月辛酉客星出梗河西北指貫索七
十日去梗河為胡兵至五年北匈奴七千騎入五原雲
中貫索貴人之牢其十二月陵鄉侯梁松坐怨望誹謗
下獄死 七年三月庚戌客星光氣二尺所在太微左
執法南端門外凡見七十五日 八年十二月戊子客
星出東方 九年正月戊申客星出牽牛長八尺歷建
星至房南滅見至五十日牽牛主吳越房心為宋後廣

陵王荆楚王英謀逆事覺自殺廣陵屬吳彭城古宋地
十三年十一月客星出軒轅四十八日十四年正
月戊子客星出昴六十日在軒轅右角稍滅昴主邊兵
後一年漢遣竇固耿秉等將兵擊匈奴一曰軒轅右角
為貴相昴為獄事時考楚事未竟司徒虞延坐與楚王
英交通自殺

孝章元和元年四月丁巳客星晨出東方在胃八度長
三尺歷閣道入紫宮留四十日滅閣道紫宮天子之宮

也客星犯入留久為大喪後四年帝崩

孝和永元十三年十一月乙丑軒轅第四星間有小客
星色青黃軒轅為後宮星出之為失勢其十四年六月
陰皇后廢 十六年四月戊午客星出紫宮西行至昴
五月滅昴為趙後一年和帝崩又一年殤帝崩無嗣太
后遣迎清河孝王子即位是為安帝清河趙地是其應
也

孝安永初元年八月戊申客星在東井弧星西南占為

大水是歲郡國四十一縣三百一十五雨水四瀆溢傷

稼壞城郭殺人民 三年六月甲子客星大如李蒼白

芒氣長二尺西南指上階星指上階為三公後太尉張

敏免官 元初二年十一月甲午客星見西方巳亥在

虛危南至胃昴

郝萌曰客星入虛大人當之又曰客星守危強臣執國命在后族又且大風有

危敗黃帝星經曰客星入守若出危大饑民食貴

延光三年十一月客星見

天市占為貴人喪四年帝崩

孝順永建六年十二月壬申客星芒氣長二尺餘西南

指色蒼白在牽牛六度客星芒氣白為兵牽牛為吳越

後一年會稽海賊曾於等殺長吏拘奪吏民揚州六郡

逆賊章何等稱將軍犯四十九縣大攻畧吏民 陽嘉

元年閏闕月戊子客星氣白廣二尺長五丈起天苑西

南主馬牛為外軍色白為兵是時燉煌太守徐白使疏

勒王盤等兵二萬人入于闐界虜掠斬首三百餘級烏

桓校尉耿畢使烏桓親漢都尉戎末瑰等出塞鈔鮮卑

斬首獲生口財物鮮卑怨恨鈔遼東代郡殺傷吏民是

後西戎北狄為寇害以馬牛起兵馬牛亦死傷於兵中至十餘年乃息

孝靈光和五年六月丁卯客星如三升椀出貫索西南行入天市至尾而消占曰天市為貴人喪明年宮車晏駕中平二年十月癸亥客星出南門中大如筵五色喜怒稍小至後年六月消占曰為兵至六年司隸校尉袁紹誅滅中宮大將軍部曲吳匡攻殺車騎將軍何苗死者數千人

魏文帝黃初三年九月甲辰客星見太微左掖門內占
曰客星出太微國有兵喪十月帝南征孫權是後累有
征役

明帝景初二年十月癸巳客星見危逆行在離宮北騰
蛇南甲辰犯宗星巳酉滅占曰客星所出有兵喪虛危
為宗廟又為墳墓客星近離宮則宮中將有大喪就先
君於宗廟之象也三年正月帝崩

高貴鄉公甘露四年十月丁丑客星見太微中轉東南

行歷軫宿積七日減占曰客星出太微有兵喪景元元年帝為成濟所弑

晉惠帝永興元年五月客星守畢占曰天子絕嗣一曰大臣有誅時諸王擁兵其後惠帝失統終無繼嗣

海西公太和四年二月客星見紫宮西垣至七月乃滅占曰客星守紫宮臣弑主六年桓溫廢帝

孝武太元十一年三月客星在南斗至六月乃沒占曰有兵有赦是後司雍究冀常有兵役十二年正月大赦

八月又大赦 十八年二月客星在尾中至九月乃滅
占曰燕有兵喪二十年慕容垂伐魏為所破死者數萬
人二十一年垂死國遂衰亡

安帝元興元年十月有客星色白如粉絮在太微西至
十二月入太微占曰兵入天子庭二年十二月桓玄篡
位放遷帝后於潯陽三年二月劉裕盡誅桓氏

宋文帝元嘉十九年客星在北斗化為彗

詳見彗門

陳廢帝光大二年六月壬子客星見氐東

周武帝保定元年九月丁巳客星見於冀 天和三年

七月己未客星見房心白如粉絮大如斗漸大東行八

月入天市長如匹所復東行犯河鼓右將癸未犯匏瓜

又入室犯離宮九月壬寅入奎稍小壬戌至婁北一尺

所滅凡六十九日占曰兵起若有喪白衣會為饑旱國

易政又曰兵犯外城大臣誅 建德三年二月戊午客

星大如桃青白色出五車東南三尺所漸東行稍長二

尺所至四月壬辰入文昌丁未入北斗魁中後出魁漸

小凡見九十三日占曰天下兵起車騎滿野人主有憂
又曰天下亂兵大起臣謀主其七月衛王直舉兵反討
禽之十月始州民王鞅擁衆反討平之

唐文宗太和三年十月客星見於水位 開成二年三
月甲申客星出於東井下戊子客星別出於端門內近
屏星四月丙午東井下客星沒五月癸酉端門內客星
沒壬午客星如字在南斗天籬旁

昭宗乾寧三年有客星三一大二小在虛危間乍合乍

離相隨東行狀如鬪經三日而二小星沒其大星後沒
虛危齊分也 光化三年正月客星出於中垣宦者旁
大如桃光炎射宦者宦者不見 天復二年正月客星
如桃在紫宮華蓋下漸行至御史丁卯有流星起文昌
抵客星客星不動已巳客星在杠守之至明年猶不去
占將相出兵

梁太祖乾化元年五月客星犯帝座

宋太祖建隆二年十二月己酉客星出天市垣宗人星

東微有芒彗三年十二月辛未西南行入氐宿二月癸丑至七星沒

太宗太平興國八年二月甲辰客星出太微垣端門東近屏星北行占曰主弼臣失禮免 端拱二年七月丁亥客星出北河星西北稍暗微有芒彗指西南 淳化元年正月辛巳客星出軫宿逆行至張七十日經四十四度乃不見占云有土功又云有使來

真宗景德二年八月甲辰客星出紫微天棓側孛孛然

如粉絮稍入垣內歷御女華蓋凡十一日沒占曰后妃
災踰年莊穆皇后崩 三年三月乙巳客星出東南方
大中祥符四年正月丁丑客星見南斗魁前占曰有
赦令其年親祀汾陰后土大赦 天禧五年四月丙辰
客星出軒轅前星西北大如挑速行經軒轅大星入太
微垣掩右執法犯次將歷屏星西北凡七十五日入濁
沒占曰周雒之分大臣憂

仁宗明道元年六月乙巳客星出東北方近濁如木星

太微有芒彗至丁巳凡十三日而沒 至和元年五月
己丑客星出天關東南可數寸歲餘消沒

神宗熙寧二年六月丙辰客星出箕度中至七月丁卯
犯箕乃散主民饑大臣有見棄者或大水河溢船行平
地 三年十一月丁未客星出天囷主倉庫憂火災

哲宗元祐六年十一月辛亥客星出參度中犯掩厠星
主有暴兵米貴晉分兵災壬子犯九孛星 十二月癸
酉入奎至七年三月辛亥乃散主邊兵動

高宗紹興八年五月客星守婁魯分也虜將悟室占之

太史曰無傷至七月虜殺魯兗滕虞等二十一王虜亦

應天象也 九年客星守亢亢陳分也九月虜將悟室

被誅悟室封陳王云 八年六月己巳客星出奎宿犯

傳舍占客星亦妖星天之使者見於天而無常所入列

舍以示休咎星大者事大而禍深色白其分有兵喪今

客星出紫微外座傳舍星宜備姦使邊夷侵境又云出

奎宿為兵姦臣偽惑天子於是金虜遣使來爭執進書

儀甲戌客星守傳舍第五星 九年正月癸酉客星始
不見自去年六月己巳至是凡一百八十五日乃消伏
時金使久在館至是乃去

寧宗嘉泰三年六月乙卯東南方泛出一星在尾宿青
白色無芒彗係是客星如土星大占客星者天之使者
偶見於天而無常所入列宿以示休咎色青憂疾白為
兵喪兵革罷民饑死於是韓侂冑方謀用兵

雲氣 虹蜺

漢昭帝元平元年正月庚子日出時有黑雲狀如焱風

亂鬻

音舜

轉出西北東南行轉而西有頃亡占曰有雲如

衆風是謂風師法有大兵其後兵起烏孫五將征匈奴

二月乙酉牂雲如狗赤色長尾三枚夾漢西行

詳見流星門

成帝永始二年二月癸未夜東方有赤色大三四圍長

二三丈索索如樹南方有大四五圍下行十大餘皆不

至地滅占曰東方客之變氣狀如樹木以此知四方欲

動者明年十二月己卯尉氏男子樊並等謀反賊殺太

守刼畧令丞自稱將軍皆誅死庚子山陽鍊官亡徒蘇
令等殺傷吏民取庫兵聚黨數百人為大賊踰年經歷
郡國四十餘一日有兩氣同時起並見而並令等同月
俱發也

哀帝建平元年正月丁未日出時有著天白氣廣如一
疋布長十丈餘西南行謹如雷西南行一刻而止名曰
天狗傳曰言之不從則有犬禍詩妖到其四年正月二
月三月民相驚動謹譁奔走傳行詔籌祠西王母又曰

從目人當來十二月白氣出西南從地上至天出參下
貫天廁廣如一疋布長十丈餘十餘日去占曰天子有
陰病其三年十一月壬子太皇太后詔曰皇帝寬仁孝
順奉承聖緒靡有解怠而久病未瘳夙夜惟思殆繼體
之君不宜改作春秋大復古其復甘泉泰畤汾陰后土
如故

王莽地皇四年漢兵起南陽至昆陽莽遣王尋王邑
將諸郡兵號百萬圍昆陽城數重軍勢甚盛晝有雲

氣如壞山墮軍上軍人皆厭所謂營頭之星也占曰

營頭之所墮其下覆軍流血三千里

袁山松書曰怪星晝行名曰營

頭行振大誅也

時光武將兵救昆陽殺王尋莽軍敗散王邑


還長安莽敗俱誅死營頭之變覆軍流血之應也

和帝永元十二年十一月癸酉夜有蒼白氣長三丈起

天園東北指軍市見積十日占曰兵起十日期歲明年

十一月遼東鮮卑二千餘騎寇右北平十六年四月

丁未紫宮中生白氣如粉絮占為喪後一年和帝崩殤



總校官庶吉士臣張能照

校對官修撰臣張書勲

謄錄監生臣張虎文

法財
人國

佛

陀

教

育

基

金

會

釋

淨

空

敬

贈

得謁中平元年黃巾賊張角等立三十六方起兵燒郡國山東七州處處應角遣兵外討角等內使皇后二兄為大將統兵其年宮車晏駕皇后攝政二兄秉權譴讓帝母永樂后令自殺陰呼并州牧董卓欲共誅中官中官逆殺大將軍進兵相攻討京都戰者塞道皇太后母子遂為太尉卓等所廢黜皆死天下之敗兵先興於宮省外延海內二三十歲其殃禍起自

何氏

袁山松書曰是年七月虹晝見御座玉堂後殿前庭中色青赤也

晉惠帝永興元年十二月壬寅夜有赤氣亘天砰隱有聲二年十月丁丑赤氣見北方東西竟天占曰並為大兵砰隱有聲怒之象也是後四海雲擾九服交兵
光熙元年十二月甲申有白氣若虹中天北下至地夜見五日乃滅占曰大兵起明年王彌起青徐汲桑亂河北毒流天下

懷帝永嘉三年十二月乙亥有白氣如帶出南北方各二起地至天貫參伐中占曰天下大兵起四年三月司

馬越收繆允等又三方雲擾攻戰不休五年三月司馬越死於寧平城石勒攻破其衆死者十餘萬人六月京都焚滅帝如虜庭

愍帝建興元年十月己巳夜有赤氣曜於西北荊州刺史陶侃討杜弼之黨於石城戰敗

宋文帝元嘉三十年正月乙亥朔會羣臣於太極前殿有青黑氣從東南來覆映宮上是年二月元凶劭構逆帝崩於合殿三月武陵王討劭建牙於軍門有紫雲二

蔭於牙上

陳宣帝太建四年有白氣如虹自北方貫北斗紫宮

十二年二月壬寅白虹見西方占曰有喪後一年帝崩
北齊後主天統三年五月戊寅甲夜西北有赤氣竟天
夜中始滅十月丙午天西北頻有赤氣占曰有大兵大
戰後周武帝總衆來伐

周武帝天和二年十月辛卯有黑氣一大如杯在日中
甲午又加一經六日乃滅占曰臣有蔽主之明者 六

年二月己丑夜有蒼雲廣三丈經天自戌加辰 建德
四年十月癸亥帝率衆攻晉州是日虹見晉州城上首
向南尾入紫宮長十丈餘庚午克之丁卯夜白虹見長
十餘丈頭在南尾入紫宮中占曰天下兵戰流血又曰
若無兵必有大喪至六年正月平齊

靜帝大象二年六月甲戌有赤氣起西方漸東行徧天
唐高祖武德初隋將堯君素守蒲州有白虹下城中
太宗貞觀十一年七月一日黃氣竟天大雨穀水溢

高宗永隆元年六月戊子虹蜺亘天蜺者斗之精占曰
后妃陰脅王者又曰五色疊至照於宮殿有兵

武太后延載元年六月幽州都督孫佺帥兵襲奚將入
賊境有白虹垂頭於軍門占曰其下流血

中宗景龍元年九月十八日有赤氣竟天其光燭地三
日乃止

肅宗至德二載正月丙子南陽夜有白虹四上亘百餘
丈

代宗寶應元年七月西北方有赤光亘天貫紫微漸流於東彌漫北方照耀數十里

德宗貞元二年正月大雨雪平地深尺餘雪上有黃黑色狀如浮埃

憲宗元和十三年十二月丙辰有白虹闊五尺東西亘天

敬宗寶歷元年十二月乙酉夜有霧起須臾遍天霧上有赤氣或深或淺久而乃散

武宗會昌四年正月己酉西方有白虹

懿宗咸通元年七月戊戌白虹橫亘西方己酉白虹橫
亘西方十一月丁酉戌時妖星初出如匹練亘空化為
雲而沒在楚分 九年七月戊戌白虹橫亘西方

僖宗中和二年七月丙午夜西北有赤氣如絳竟天

昭宗光啟二年九月白虹見西方十月壬辰夜又如之
光化二年春有白氣竟天如練自西南徹東北而旋
天復三年三月庚申有曲虹在日西北

後唐明宗天成二年十二月壬辰酉時西南方有赤氣如火燄燄約二千里占者云不出二年其下當有大兵晉高祖天福二年正月二日夜初北方有赤氣西至戌亥地東北至丑地南北闊三丈狀如火光赤氣內見紫微宮及北斗諸星至三點後內有白氣數條次西行至夜半子時方散 八年正月丙戌黃霧四塞 九年正月乙未大霧中二白虹相偶四月庚戌大霧中有蒼白

二虹

末帝開運元年正月乙未大霧中有白虹相偶占者云海
海淫所興其將有戰時帝在澶州與契丹相守

周太祖廣順元年十一月甲子白虹竟天

宋太祖乾德三年七月己卯夜西方起蒼白氣長五十
尺貫天船五車亘井宿占曰主兵動 六年十月己未
亘西北蒼白氣三道長二十尺趨東散占曰游兵之象
太宗太平興國四年四月己未夜西北方有白氣壓北
斗 雍熙三年正月己未夜赤氣如城占為兵 四年

正月癸酉夜白氣起角亢經太微垣歷軒轅大星至月
旁散 端拱元年十月壬申遲明翼上有雲氣過中天
連地濃潤前赤黃後蒼黑色先廣後大行勢如截占曰
將領行陣有大克捷十一月戊午夜西北方有赤氣如
日脚高二丈 至道二年二月丙子夜西方有蒼白氣
長短八道如彗掃稍經天漢參錯如交蛇占曰所見之
方主兵勝

真宗咸平三年十月辛亥黑氣貫北斗占曰兵起人疫

十二月庚午黑氣長三丈餘貫心宿入天市垣抵帝座
久方散 四年三月丙申白氣二亘天十月辛亥黑氣
貫北斗 五年正月白氣如虹貫日久而散七月戊戌
白氣如陣貫東井 六年四月己巳白氣東西亘天丁
丑白氣貫日五月辛亥白氣出昴至東壁沒六月辛未
赤氣出婁貫天庾占曰倉廩有火災丙子白氣出河鼓
左右旗分為數道沒七月癸卯白氣如彗起西南方占
曰有兵喪 景德元年三月白氣貫軒轅蒼白氣十餘

如布亘天七月辛亥黃氣出壁長五尺餘占曰兵出十

一月癸丑黑氣十餘道衝日二年正月丙寅黃白氣

環之二月丁亥白氣五道貫北斗占為大風幸臣憂十

月丙子白氣出閣道西字字有光占曰宮中憂三年

三月丙辰北方赤氣亘天白氣貫月十月甲午黑氣貫

北斗魁占曰夷兵起四年三月己未白氣東西亘天

庚申白氣出南方長二丈許久而不散四月庚午白氣

貫北斗長十丈占為大風庚寅白氣如布襲月三丈許

甲午南方有黑氣貫心宿長五丈許占大水十一月已
已中天有赤氣如掃長七尺在輿鬼南占曰秦兵疫

大中祥符元年正月癸亥朔黃氣出於艮占曰主五穀
熟丁丑白氣二東西亘天七月西北方白雲氣如彗帚
三十餘條占曰主兵戰二年九月戊午黃氣如柱起
東南方長五丈許三年四月丁巳中天有黑氣東西
亘天占為水十二月癸亥青赤氣貫太微五年二月
壬寅白氣長五丈出東井貫北斗魁及軒轅占為兵為

雷雨 七年九月有氣出紫微為宮闕狀光燭地 天
禧三年四月黃氣如柱貫月占曰女后喜

仁宗天聖七年二月己卯夜蒼黑雲長三十尺貫弧矢
翼軫占曰荆楚水 明道元年十月庚子夜黃白氣五
貫紫微垣十二月壬戌西北有蒼白氣亘天 景祐元
年八月壬戌夜有黃白氣如彗長七尺餘出張翼之上
凡三十日不見 四年七月戊申夜黑氣長丈餘出
畢宿下 寶元二年正月壬子夜蒼黑雲起西北長三

十尺漸東南行歷婁胃昂畢及火木相次中天而散占

曰水災倉穀腐敗胡王死邊兵憂若七日有雨則不占

三月甲寅夜細黑雲起西北方長三十尺貫王良及營

室占曰衛分大人憂 康定元年三月丙子夜東南方

近濁黑氣橫亘數丈闊尺許良久散占曰東南有水憂

六月壬子黑氣起心宿西長五十尺首尾侵濁久之散

占曰大雨水 二年八月庚辰夜東方有白氣長十尺

許在星宿度中至十日長大餘衝天相居星宿大星南

九十餘日沒壬午夜黑氣起西南長七丈貫危宿羽林
入濁至天津良久散癸卯夜蒼白雲起西北闊二尺許
首尾至濁良久漫占曰其下有兵 慶歷二年十一月
壬申黑氣貫北斗柄甲申白氣貫北斗 三年正月戊
戌中天有白氣長二十尺向西南行貫日占曰邊兵憂
四月癸卯白氣二生西北隅上中天首尾至濁東南行
良久散占曰其下有兵寇七日有大風雨則不占七月
戊辰夜西南生黑氣長三尺許經天而散占曰雨水八

月壬子夜白氣貫北斗魁 四年五月甲子夜黑氣起

東北方近濁長五丈許良久散占曰大雨水宜治津梁
九月辛巳夜中天有白氣長二丈許貫參宿南河東北
行少頃散占曰風雨之候十一月甲子夜蒼白雲起南
近濁久方散占曰南方有兵寇七日有大風雨則不占
八年正月丁酉夜黑氣生首尾至濁漸東行久之不
散占曰水災二月辛卯夜西方近濁生黑氣長三丈許
良久散占曰水災 皇祐四年十一月壬寅夜黑氣生

東方南北至濁貫參宿軒轅占曰主邊境有火憂辛酉
夜白氣起北方近濁長五丈許歷北斗久之散占曰多
大風

英宗治平元年六月戊午夜蒼白雲起東北方長一丈
許貫畢占云有兵禍 二年二月乙未夜蒼黑雲起西
北方長五丈許貫東井及北斗良久散占曰大水民疾
病四月癸巳夜蒼黑雲起西北方長三十尺西至軒轅
太民北抵鉤陳占曰雨水後宮有疾病之憂丙午夜西

北方有白氣漸東南行首尾至濁貞角宿移西北久方
散占曰有兵戰疾疫事九月庚申夜西北蒼黑雲長三
丈許貫營室壘壁陣及天河占曰土功興及雨水 三
年六月丁未夜東方有蒼白雲長一丈許貫畢占曰歲
不收亦陰雨之候

神宗治平四年二月癸巳夜蒼白雲起南方長三丈闊
尺貫南門星主兵出閏三月辛巳蒼黑雲起南方兩首
至濁闊尺貫尾箕斗牛庫樓騎官主陰雨五月戊寅夜

蒼黑雲起北方長三丈闊尺貫紫微垣王良主蕃國有
暴兵及奉車官憂壬寅夜蒼黑雲起北方長三丈闊尺
貫紫微垣主暴兵六月癸亥夜白雲起東北方長五丈
上閤下東貫天船閣道傳入紫微垣天棓主嗇夫遇賊
亦為雨候八月乙亥夜黑雲起西北方長丈闊尺貫北
斗主陰雨十月庚申夜黃氣一上下貫月中主女主憂
十二月庚戌夜蒼黑雲起南方長三丈闊二尺貫五車
東井五諸侯主陰雲 熙寧元年正月乙酉夜蒼白雲

起西南方長四丈闊尺貫月及南河鬼軒轅主秦分暴
兵六月己酉夜蒼黑雲起北方長二丈闊尺貫北斗魁
東貫文昌主三公疾民憂十月庚申夜蒼黑雲起北方
東西兩首至濁貫織女天棓紫微垣北斗魁主暴兵三
日有雨則解 二年四月甲辰夜蒼白雲起東南方長
二丈闊尺貫天市垣主人多疾疫七月甲申日下有五
色雲十一月每夕有赤氣見西北隅如火至人定乃滅
三年二月庚辰夜蒼黑雲起西北方長三丈濶二尺

貫王良扶箱天厨占同上 四年六月己未夜蒼黑雲

起西北方長丈闊貫五車又起西北方長丈餘貫北斗

魁文昌主大臣憂 五年七月丁亥夜白雲起南方長

丈貫氐房心 六年五月庚申夜蒼黑雲起東北方長

五丈闊二尺貫雲雨閣道 七年三月壬子蒼白雲起

西南方長二丈闊尺貫日經中天過白氣如帶主兵四

月壬申夜蒼白雲起北方長五丈闊二尺貫北斗魁鉤

陳王良閣道東至奎六月辛未夜蒼黑雲起天河中長

五丈南北兩首至濁貫尾箕又蒼黑雲起東方長五丈
貫羽林軍外屏丙戌夜蒼白雲起南方長二丈貫危室
壁及八魁主齊衛分憂或土木功壬辰夜蒼白雲起西
北方長二丈貫天棓紫微垣主分爭與刑罰藏兵禦難
備非常人之處有憂又主牛畜多死七月庚戌夜蒼白
雲起東方長丈餘貫參旗及參宜察臣下 八年二月
己巳夜蒼黑雲起東方長三丈貫心天市垣列肆宗星
主物貴五月癸亥夜蒼黑雲起西方長三丈貫軒轅太

微垣五帝座主諸侯憂十月庚子夜黑雲起西北方長
三丈貫畢大陵鉤星 九年四月庚寅夜白氣長丈起
東北方天市垣辛亥夜蒼黑雲起南方長二丈貫庫樓
騎官積卒心尾主憂六月乙未蒼白雲起東北方長四
丈貫室壁閣道主兵憂七月己卯夜蒼黑雲起南方長
四丈貫軍市天園主兵十月乙酉夜蒼黑雲起西北方
長四丈貫北斗鉤車府主雨 十年六月癸未夜蒼黑
雲起南方長三丈闊尺貫龜鼈天淵主多雨水七月丙

子夜蒼黑雲起北方長丈貫北斗魁主民憂貴臣獄或多雨八月庚辰蒼黑雲起東北方長二丈貫參井北河五諸侯主諸侯憂或大水九月庚申夜蒼黑氣起北方由北斗魁杓貫紫微垣至天樞元豐二年四月戊申夜白雲起南方長三丈貫庫樓積卒龍尾主將死或大臣黜五年四月壬申夜蒼白雲起北方長三丈出太微垣貫五帝座常陳主人主大喜八年七月庚申夜蒼黑雲生北方長三丈闊尺貫北斗文昌天槍主三日

內有雨及大臣黜

哲宗元祐三年七月戊辰夜東北方近濁天明照地如
月將出漸徧西北有白氣經天主兵宜防西北二鄙
紹聖二年十一月桂陽監慶雲見 元符二年九月戊
辰夜赤氣起北方紫微垣北斗星東南次有白氣十道
各長五尺主兵及大臣黜

徽宗崇寧元年十一月己酉赤氣隨日沒主大旱及外
有告急 二年五月戊子夜蒼白氣起東南方長三丈

賈尾箕斗主蠻夷入貢舊臣來歸 政和元年十一月

甲戌夜蒼白氣起紫微垣賈四輔主相凶 五年四月

庚子有白雲自北直徹中天漸成五色如華蓋 七年

五月乙卯夜赤雲白氣起東北方主大旱民饑喪 宣

和元年六月辛巳夜有赤氣起北方半天如火主臣叛

君 二年二月戊戌夜赤雲起東北漸向西北入紫微

垣主臣叛君天下兵起 三年九月壬午夜蒼白氣長

三丈貫月主其下有亂者 四年九月丁丑西方日下

有赤氣 七年四月壬子夜有赤雲入紫微垣主兵起
欽宗靖康元年正月丁丑夜赤白氣起西方主所向兵
至九月戊寅有赤氣隨日出十一月己丑日下有赤氣
閏十一月丁酉赤氣亘天 二年正月己亥夜西北陰
雲中有火長二丈餘闊數尺時時見丁未霧氣四塞人
對面不相視二月壬午夜白氣如虹自南亘北漸移西
南至東北二月戊子夜白氣貫斗

高宗建炎元年八月壬申東北方有赤氣 四年三月

辛亥白虹貫日京房易傳曰蜺日旁氣也白蜺雙出日

中茲謂擅陽五月壬子赤雲亘天中又有白氣十餘道貫之如練起於紫微垣犯北斗及文昌由東南而散占兵大起又所向兵至宮中有喪 紹興元年二月己巳

白氣亘天占有暴兵 七年十一月癸卯有赤雲如火

隨日入 八年二月辛巳日中有白虹亘天九月甲申

正北方有赤氣如火影 二十七年二月乙酉赤氣出

紫微垣壬寅白虹貫日 三十年二月壬申西北方正

北方東北方一帶約五處赤氣如火影十一月甲午西南方白氣由尾宿歷壁宿婁宿昴宿止十二月戊申夜白氣出尾宿歷心房氏亢角宿入天市貫太微至郎位止有類天漢白氣主兵明年金人大入寇辛酉曲虹見日之西占曰虹蜺陰陽交錯之氣曲虹冬見異之尤甚也 三十一年十二月辛丑白氣自斗歷牛女虛

孝宗隆興元年十二月壬午白氣自危宿歷室壁婁胃昴宿 二年正月甲寅白氣自壁宿歷奎婁昴畢觜參

乾道元年正月庚午夜白氣出奎漸上經婁胃昴貫
畢入參占主殺伐主邊城三月戊辰夜白氣自參宿至
角宿與天漢相接其白氣約廣七丈已來占有暴兵四
月丁酉夜蒼白氣自西北漸上東北入天市垣辛丑入
北斗魁中乙巳入紫微垣內至天樞天樞中十一月丙
寅白氣出女歷虛危室壁上奎婁胃昴宿十二月庚午
白氣亘天 三年十月丙申虹出非時 四年三月己
丑四方皆昏濛若下塵占名曰靈語云天地靈君臣乖

五年正月甲申昏霧四塞又曰黃霧 六年十月庚

午赤氣隨日出占氣如火隨日出者軍行有兵憂十一
月丁丑赤氣隨日入占有告急者或檄天下召兵不行
七年六月壬寅十月戊午赤氣隨日出 八年十月
乙巳赤氣隨日入丙午赤氣隨日出占君側有佞臣

九年十月壬申日出前東方并日入後西方有雲氣若
煙非煙若雲非雲青赤黃三色光潤占凡氣有三色名
曰商雲商雲見則國有慶乃人君修德而致 淳熙元

年十月戊寅東北方生曲虹見日之東 二年十月庚
辰東南方生青赤黃蠖虹虹生非時 三年八月丁酉
赤氣隨日沒戊戌赤氣隨日出 五年十月丁巳曲虹
見日之東 十年正月戊子西南有白氣如天漢而明
南北廣六丈東西亘天占有兵起 十四年十一月甲
寅赤氣隨日入

光宗紹熙四年十一月甲戌夜赤雲白雲見占赤雲如
火影見者如疋帛天下多兵 五年六月壬寅白氣如

帶道亘天已酉亦然喪之象也於是孝宗崩寧宗受禪

寧宗慶元元年正月丙辰白虹貫日 四年八月庚辰

赤氣如帶亘天占有暴兵 五年二月癸酉夜白氣如

帶道亘天 嘉泰三年七月壬午白虹貫日 四年二

月庚申赤氣亘天次月臨安大火逼近太廟十一月虹

生非時壬申白氣如帶道亘天占有暴兵 嘉定六年

十月乙卯有赤氣隨日出十一月辛卯有赤氣隨日入


十一年二月丙辰白虹貫日

宋中興天文志曰書星變而至於蜺虹雷電非時
塵霧雲氣雜見必書何也凡皆氣也張自明曰一
元肇判分陰分陽輕清為天重濁為地逆生五行
順布五氣故五氣之會其精秀靈明者為日為月
為星為河漢五氣之散颺而為風和而為雨鬱而
為霧結而為雲舒而為霞凝而為露肅而為霜冽
而為雪戰而為雹擊而為雷爍而為電駁而為虹
其變十有二無非氣也而是氣之忽合忽分又各

有形有象殆不可徧舉其為災為祥亦或有應有
不應或應焉而人莫之知也然而推步宿曜之道
度分晷垣舍之名數覘象色之所見驗躔分之攸
屬參之於璣衡候之於晷漏探應感於精祲求形
驗於事情以考以告以戒以勸以慮以備占其有
益於人國太史遷曰孔子六經紀異而說不書至
於天道不傳傳其人不待告告非其人雖言不著
有味其言哉所志者占云



文獻通考卷二百九十四



總校官庶吉士臣張能照

校對官修撰臣張書勲

謄錄監生臣彭希純